

NIH (Ured za programe saradnje)

Nacionalni institut za zdravlje (NIH) je glavna Državna agencija za provođenje i podršku medicinskim istraživanjima u SAD-u. Ured za programe saradnje realizira približno 84% NIH-ovog budžeta od 29 milijardi US\$ kroz različite grantove. NIH putem grantova finansira konzorcije i ugovarače koji unaprijeđuju fundamentalna znanja o prirodi i ponašanju živih bića. Ova znanja su u skladu sa misijom NIH-a da produžuje zdrav život i umanjuje probleme uzrokovane bolešću ili hendikepom.

Prijava projekta

NIH grantovi se mogu dodijeljivati domaćim i stranim organizacijama, javnim i privatnim, profitnim i neprofitnim. Prihvatljive organizacije obuhvataju vlade, uključujući državne institucije, visokoškolske ustanove, bolnice, te na ovaj način i pojedince.

Da bi se razmatrala aplikacija, aplikant mora ispunjavati uslove i mora predati potpunu aplikaciju u skladu sa rokovima. Informacije koje je potrebno dostaviti standardno uključuju opis projekta, budžet i obrazloženje budžeta, kraće biografije ključnih osoba, te ostale informacije navedene u uputama za aplikaciju, u pozivu i/ili smjernicama programa. Ovisno od vrste projekta, programi se mogu prijavljivati poštom ili on-line različitim NIH institutima i centrima. Za prijavljivanje je potrebno biti registriran, a registrirati se može na zvaničnim web stranicama NIH. Registracija je obavezna i za institucije i za osoblje koje namjerava učestvovati u realizaciji programa koje finansira NIH. Više detalja o samoj elektronskoj registraciji na http://www.grants.gov/applicants/get_registered.jsp. Moguće je istovremeno podnijeti više različitih prijava, uz uslov da su naučno različite. Za prijavu u sklopu R01 programa, potrebno je, pored samog plana istraživanja i ciljeva, definisati lokacije istraživanja, ostale informacije o projektu, rukovodeće/odgovorno osoblje, budžet. Organizacije moraju ispunjavati kriterije i državne standarde politika o ljudima, životinjama, biootrovima, propisima biosigurnosti i bioprevencije. Materijali koji se šalju u prilogu aplikacije moraju biti što koncizniji i trebaju sadržavati sve potrebne informacije za naučnu i stručnu evaluaciju.

Vrste projekata

U okviru NIH-a postoje slijedeće osnovne vrste projekata (grantova):

1. Grantovi za istraživačke projekte (R serija);
2. Razvoj karijere (K serija);
3. Istraživačka obuka i stipendije (T i F serije);
4. Programski projekti/Centralni grantovi (P serije);
5. Grantovi za razvoj resursa (razne serije);
6. Trans-NIH programi;

sa detaljnije razrađenim aktivnostima (ukupno 195) razvrstanim u serije.

Generalno, strane institucije i međunarodne organizacije se mogu prijavljivati **direktno za grantove za istraživačke projekte**. Postoje i određeni mehanizmi finansiranja (poput **grantova za programske projekte** P01) domaćih institucija sa inostranom komponentom, **putem konzorcija**. U ovom kontekstu, pod „inostranom komponentom“ se podrazumijeva izvođenje bilo kojeg značajnog elementa ili segmenta projekta izvan SAD, bilo od strane korisnika ili istraživača zaposlenog u inostranoj instituciji, uz uslov da te aktivnosti uključuju: ljude ili životinje; potrebu intenzivnog putovanja u inostranstvo s ciljem prikupljanja podataka, istraživanja, uzimanja uzoraka i sl.; te sve aktivnosti korisnika koje uključuje populaciju, okoliš, resurse ili aktivnosti strane zemlje. Uslovi učešća su jasno naznačeni u svakom pozivu.

- 1) NIH Program grantova za istraživačke projekte (R01) – namijenjeni za konkretne, specifične, ograničene istraživačke projekte, bez finansijskog limita, izuzev ako je naglašeno u aktuelnom pozivu, generalno se dodjeljuju na period 3-5 godina, podnose se u svim IC-ovima. Prijave se vrše isključivo elektronski (<http://apply07.grants.gov/apply/GetGrantFromFedgrants?opportunity=PA-07-070>, i http://www.grants.gov/applicants/apply_for_grants.jsp), sa općim rokovima prijave (do 5. februara, 5. juna i 5. oktobra). Predloženo istraživanje bi trebalo dati posebne mogućnosti za proširenje istraživačkih projekata korištenjem izvanrednih sposobnosti, resursa, stanovništva ili uslova okoliša u drugim zemljama, a koji ne postoje u SAD-u ili će dopuniti postojeće u SAD-u. Potrebno je istaći na koji način je predloženi projekt relevantan za misiju i ciljeve određenog IC-a i ima li potencijal značajnog unaprijeđenja zdravstvenih nauka u SAD-u.

- 2) Grant za istraživanje u programskim projektima (P01) – namijenjeni za podršku širokim, multidisciplinarnim, često dugoročnim, istraživačkim programima sa specifičnim općim ciljem ili nekom osnovnom oblasti. Programski projekt obično uključuje organizirane napore relativno velikih grupa čiji članovi provode istraživačke projekte s ciljem osvjetljavanja različitih aspekata ili komponenti ovog cilja. Svaki istraživački projekt je obično pod vodstvom nekog iskusnog istraživača. Programski projekt je suprotan tradicionalnim istraživačkim projektima jer istražuje spektar problema sa zajedničkim fokusom, a ne fokusira se samo na specifičnu, izdvojenu pojavu. Svaki projekt doprinosi zajedničkoj temi ukupnih istraživačkih napora.

Finansiranje projekta

Ne postoji limit za finansiranje po pojedinom projektu. Odluka će se donijeti na osnovu ciljeva, značaja i ostalih kriterija kvalitete i utjecaja konkretnog projekta. Predloženi budžeti moraju biti izraženi u US\$, detaljni (popunjen dio obrasca SF424 koji se odnosi na istraživanje), ne postoji mogućnost korištenja sredstava ostvarenih oslobođanjem od carine i uvozne takse, do 8% ukupnog budžeta može biti zahtijevano za pokrivanje administrativnih troškova (bez opreme). Kao dio konzorcija, svaka institucija direktno popunjava vlastiti segment prijedloga budžeta (nije moguće predložiti modularni budžet). Postoji mogućnost pokrivanja predprojektnih troškova do 90 dana prije početka realizacije projekta, međutim stvaranje takvih troškova ne obavezuje NIH i na odobravanje istih.

Traženje partnera

Na zvaničnim web stranicama ne postoji alat niti preporuke za pronalazak partnera, iako su partnerstva dozvoljena i poželjna.

Svojim programima NIH podstiče saradnju gdje god je to opravdano. Određeno mjesto je dato i stranim institucijama, s ciljem razvijanja i uspostavljanja bližih kontakata i saradnje koja će biti od obostrane koristi.

Sve ideje koje su u skladu sa misijom NIH-a su prihvatljive i zavisno od kvalitete prijedloga mogu biti prihvaćene i finansirane.

Učesnici programa mogu biti svi oni koji posjeduju osobine i karakteristike potrebne za realizaciju predloženog i odobrenog programa istraživanja.

Iako NIH najveći dio sredstava dodjeljuje za istraživanje, moguće je dodjeljivanje grantova i za srodne aktivnosti poput izgradnje objekata, obuke, razvoja kapaciteta, konferencija, grantova za resurse i drugo.